

欽定大清會典事例

欽定大清會典事例卷二百五十四

戶部

俸餉 京城兵餉

京城兵餉。○凡八旗前鋒親軍護軍領催弓匠長。月給餉銀四兩。驍騎弓匠銅匠。月給餉銀三兩。皆歲支米四十八斛。步軍領催。月給餉銀二兩。步軍一兩五錢。鐵匠一兩至四兩。皆歲支米二十四斛。礮手。月給餉銀二兩。歲支米三十六斛。由覺羅補前鋒親軍護軍者。月加餉銀一兩。養育兵。月給銀一兩五錢。不給米。官畜馬駝。每

馬駝月給豆草折價銀三兩。○八旗官親隨兵坐糧。領侍衛內大臣滿洲都統各八名。蒙古漢軍都統前鋒統領護軍統領各六名。步軍統領五名。滿洲副都統四名。蒙古漢軍副都統各三名。步軍翼尉一名。前鋒參領護軍參領驍騎參領各二名。副護軍參領副驍騎參領前鋒侍衛上三旗內府參領各一名有半。以上親隨兵每名月給銀三兩。米一石。折銀一兩。八旗佐領上三旗內府佐領各於本佐領額兵內。食糧一分。民公四名。侯伯各三名。大學士尚書左都御史

內大臣子各二名。侍郎學士左副都御史通政使。大理寺卿詹事散秩大臣。男。王府長史各一名。以上親隨兵。每名月給餉銀一兩。米二斛。步軍協尉給坐糧二分。步軍副尉捕盜官各二分。步軍尉一分。均於額設步軍內撥給。○巡捕營馬兵。月給銀二兩。步兵一兩。皆月給米三斗。每馬一匹。月給豆草銀二兩五錢。○順治初年定。滿洲都統准親隨兵八名。蒙古漢軍都統六名。護軍統領前鋒統領五名。民公四名。侯伯滿洲副都統三名。蒙古漢軍副都統領侍衛內大臣

大學士尚書左都御史。子各二名。侍郎左副都御史。學士通政使。大理寺卿。詹事主府長史。前鋒參領護軍參領。驍騎參領。男佐領各一名。均按名支給糧餉。○又題准。八旗前鋒護軍領催驍騎。每名月給餉銀二兩。匠役一兩。○二年定。覺羅充驍騎校者。月給餉銀三兩。○四年題准。新歸旗內滿洲蒙古漢軍兵。未經撥給地畝者。照例折給馬乾銀。○六年定。步軍月給餉銀一兩。○九年定。前鋒護軍。每名月給餉銀三兩。○十年定。領催每名月給餉銀三兩。○十二年定。

步軍領催。月給餉銀一兩五錢。○康熙六年覆准。領侍衛內大臣給親隨兵五名。內大臣給親隨兵二名。○九年題准。前鋒護軍領催。月給餉銀四兩。驍騎。月給餉銀三兩。○十四年議准。前鋒護軍領催。驍騎。每月各減銀一兩。○十八年覆准。散秩大臣給親隨兵一名。○二十二年題准。前鋒護軍領催。驍騎。餉銀。仍照舊給發。○二十四年題准。前鋒護軍領催。驍騎。每歲給餉米四十八斛。步軍二十四斛。均按春秋兩季支給。○又題准。親隨弓匠長。及各旗弓匠長。月給餉

銀四兩。其餘弓匠。月給餉銀三兩。○二十五年奉

旨。步軍等餉銀。每月加給五錢。○雍正元年議准。現今八旗滿洲都統親隨兵八名。蒙古漢軍都統各六名。領侍衛內大臣前鋒統領護軍統領步軍統領各五名。滿洲副都統三名。蒙古漢軍副都統各二名。步軍翼尉一名。所得銀米。舊例與驍騎相等。後經裁減。每月止給銀一兩。米二斛。應將副都統護軍統領步軍統領步軍翼尉等親隨兵。仍照舊數給銀三兩。至領侍衛內大臣職

任較大。其親隨兵數應與滿洲都統同。前鋒統領護軍統領皆有管轄兵丁之責。其親隨兵數應與蒙古漢軍都統同。並支領銀三兩。此項親隨兵毋庸給米。每名照米數歲折銀十有二兩。於支米時給發。○二年

諭八旗大臣等親隨兵錢糧有領受者。亦有不領受者。此後著一概照例給予。欽此。遵

旨議定。每旗前鋒參領二人。前鋒侍衛二人。護軍參領十有六人。副護軍參領十有四人。其前鋒參領護軍參領皆有食一兩錢糧之親隨兵一名。今

增給錢糧二兩。米折銀一兩。至前鋒侍衛副護軍參領向無親隨兵。亦給予一名。每月食錢糧銀一兩。米折銀一兩。○七年

諭近有奏請上三旗增設副護軍校者。朕思八旗佐領下。均有副驍騎校。八旗每佐領下。著增副護軍校一人。副驍騎校副護軍校。每月著加賞銀一兩。共食餉五兩。米照常。再從前所授副驍騎校均有頂戴。今增授副護軍校。亦著給予頂戴藍翎。○八年奏准。五城地方大小街衢。設柵欄四百四十座。每柵欄設綠營步兵二名。共增步兵八百八十名。於三營

步兵隊內。給予月餉。令其輪班看守。○十二年
議准。八旗兵丁餉銀。除老病告退人等。其名已
列入餉冊送部。例不增裁外。伊等有缺頂補。毋
庸零星咨部。其在逃獲罪斥革等缺。令該旗於
出缺之時。即咨部註冊。以便覈對。追繳錢糧。僅
有領催人等。將上月出缺日期。捏報下月。及侵
分應繳錢糧者。該旗都統查出。即題參交部治
罪。並將失察該管官弁。一併參處。○又議准。八
旗兵丁餉銀。係按月關支。米係豫領。一季除老
病告退及病故者。仍照舊免追外。嗣後革退。

逃各兵所領一月餉。即於革退及報逃之日。按日追繳。領過之米。於一月內革退報逃者。追繳後三月米。兩月以內者。追繳後兩月米。三月以內者。追繳後一月米。三月以外免追。○十三年議准。八旗護軍月支餉銀四兩。驍騎三兩。今將伊等歸併火器營。其正身滿洲。遇有護軍前鋒缺出。遴選拔補後。再照例支給餉銀四兩。其養子及別載冊籍人等。既補驍騎。即照驍騎例支給三兩。裁去五錢。○又議准。公主等府屬兵。均係

內廷撥給。毋庸議外。其郡主看門兵。准給五名。縣主郡君各四名。縣君三名。鄉君二名。每名月給銀二兩。每季米八斛。郡主等薨逝後。仍給錢糧。令其看守墳墓。如郡主等革去品級。將銀米一併裁革。○乾隆元年

諭八旗護軍校驍騎校等。原係食俸之人。因欲令伊等用度從容。故將俸改餉銀。而遇閏之年。不得與兵一例支領閏餉。用度未免拮据。著於本年為始。凡遇閏月。照兵丁例支給閏餉。○又議准。八旗世爵自男以上。已有親隨兵。若兼都統副都統參領者。止准

一處支給。不得重領。○又議准。八旗佐領。並上三旗內務府佐領。給予親隨兵。原因其有辦事之責。此內如別有差委。及不能辦理佐領事務。或年幼未曾辦事者。均停給。別給委署之人。若委署之人。原有本任親隨兵。則停其重給。至差往軍前牧廠等人。係出征效力。其代署佐領之人。停給。仍給本人。永為定例。○又議准。八旗滿洲副都統。原定親隨兵三名。較滿洲都統少五名。應加一名。蒙古漢軍副都統。原定各二名。較蒙古漢軍都統各少四名。應各加一名。護軍參

領前鋒參領驍騎參領原定各一名。應各加一名。副護軍參領副驍騎參領前鋒侍衛原定各一名。應各加半名。其上三旗內府參領等一例給予。以上每名給餉銀三兩。米折銀一兩。按月關支。至八旗佐領並上三旗內務府佐領。從前原各有親隨兵一名。於康熙四十三年裁去。今應於本佐領下額兵數內。各給一分。以資養贍。○又議准。尚書侍郎等。兼管都統。副都統者。其都統等任內親隨兵。應准兼支。郎中等兼佐領者。亦准兼支。○又議准。都統。副都統參領有兼

佐領者已支都統等任內親隨兵。其佐領親隨兵。不准兼支。○又議准。各旗賞給都統副都統等職銜。現有差委者。仍照例支給親隨兵。給空銜不任事者。不准支給。○又議准。額外都統副都統參領副參領等。現在辦事者。俱給親隨兵。不辦事者。不准支給。○又議准。文官三品以上。原有親隨兵者。仍照舊支給。○又議准。都統等官。奉差在外。無養廉者。准支親隨兵。有養廉者。不准支。○六年題准。巡捕三營馬匹豆草。無論年歲豐歉。價值低昂。每營馬一匹。月折銀二兩。

五錢。由部按月支給。再向例給領價值。按時價
每兩扣存銀一錢。名為節省。今既酌定銀數。再
扣一成節省。恐致不敷。應免其扣存。按照時價
實數支給。歲終。令步軍統領將三營領過豆草
乾銀數目。造冊送部覈銷。○九年題准。八旗兵
米。每季均有撒尾。由領催等總領分支。如有侵
減之弊。該都統立拏送部究處。○十四年定。旗
員革職留任。並閒散之人。奉

旨署理職任。所辦事務。與現任實授官無異。應得親
隨兵一例給予。○十五年議准。在京八旗漢軍。

補授漢大學士尚書等職者。原係漢缺。毋庸給予親隨兵。○又議准。八旗兵丁月餉冊籍。例於前一月十五日過部。分別支扣。嗣後兵餉。凡升轉病故。若於十五日。即照餉冊。未經過部。例辦理。至十六日。仍照餉冊。已經過部。例辦理。○二十二年覆准。八旗陣亡軍營身故。及臨陣未出兵丁等餉銀。均以咨文到旗之日為準。在餉米冊檔過部以後。准其支領。在冊檔過部以前。即行裁汰。○二十七年覆准。原有隨甲之員。奉旨兼署大銜。准支領署任大銜隨甲。丁憂回旗之副。

將等奏明在參領等官上行走之員。照行走之職任。支給隨甲。○二十八年議准。八旗餵馬草束。每一年所需馬銀。各旗豫領一半。將一年所用草束。於秋季採買。餘賸一半銀兩。仍每月支領。以買麩麩等項。○又議准。八旗滿洲蒙古護軍前鋒火器營親軍。餵養馬匹。隨圍歸日。分給各旗餵養後。若有倒斃。扣四箇月空錢糧買補。有殘疾馬匹。即行變賣。將變價銀兩收存。仍扣三箇月空錢糧買補。○又議准。八旗滿洲蒙古護軍前鋒火器營親軍。餵養馬匹。隨圍途中。實

在倒斃照例賠銀。遺失馬匹。同時買好馬賠補。
○二十九年覆准。八旗兵丁。每月搭放錢文。無
論二成三成。俱於初一初二等日。一齊搭放。○
三十二年議准。八旗養育兵應支三色米石。全
行支給稜米。於每年二月內。作為一季關領。儻
不能親往。該佐領遴派領催代關照數交付。如
私賣給錢。將該領催究治。該管官員議處。○三
十六年奏准。八旗養育兵丁。每名歲給稜米一
石六斗。○又

諭。隨園官員等所倒馬匹。照常勒限兩箇月賠還。兵丁

所倒馬匹在錢糧內按月扣銀一兩完結。著永為定例。○又議准。隨圍官駝。每十隻准報倒斃一隻。額外倒斃駝隻。作為十分。武備院牽駝人等。著賠七分。在俸餉內坐扣。察哈爾蒙古等。著賠三分。於所存牽駝披甲餉銀內扣補。其駝隻行走內地。每日每駝料豆二斗。○四十年

諭八旗兵丁甲米。閏月例不支放。向係賞給。並非常例。現在逢閏例無應放之米。兵民口食。未免拮据。嗣後凡遇閏月一體賞給。著為令。○四十一年議准。在京八旗看守京通各倉兵丁月餉。通倉由倉場造

冊咨部給領其餘各倉俱隨本旗入檔關支。○
又議准八旗護軍披甲拜唐阿內有考中舉人
生員者如情願退糧讀書即將錢糧裁汰情願
照舊當差仍准支給錢糧至退去護軍披甲拜
唐阿停止錢糧之舉人生員以及由閒散考中
舉人生員內有情願在護軍披甲拜唐阿上行
走者看其騎射挑補披甲等差給予錢糧。○又
議准八旗兵丁於每月初一日領餉之後革退
者長支本月餉銀免其追繳。○又議准八旗領
米冊檔按各佐領下額設兵丁定數填寫有本

佐領下挑補別佐領下額缺者。即入挑補之佐領檔內支領。○四十三年奏准。火器營官兵支領米石。照健銳營之例。由八旗滿洲蒙古旗分辦理。○又奏准。閏月米石。定於前一月十五日過部。於閏月初一日。創倉開放。一切支領裁除。均以過檔之日為準。分別覈辦。至八旗四季甲米冊檔。仍按各旗過檔定限辦理。如新挑兵丁及食周年半餉之孀婦人等。在米檔過部定限以前。准其支領。在過檔定限以後。概不准支領。

○又奉

旨。兩翼翼尉二員。每員額給馬糧四名。歲支餉乾銀二百十六兩。米十四石零。翼翼尉並不經管三營事務。不應給予名糧。況又有額設養廉四百兩。此項銀米。即著裁去。○四十九年奏准。

御船處水手。每月錢糧。向自三兩二兩至一兩五錢不等。均改為一兩五錢。水手頭目。每月向給三兩。今改給二兩。每年各添給米二十四斛。○五十二年奉

旨。步甲逃後。多領錢糧。著於該佐領驍騎校名下追六分。本參領名下追四分。仍交部分別查議。○五十六

年覆准在京巡捕五營共額設字識六十六名俱支食馬兵錢糧。○五十九年奏准八旗官兵拴養官馬應領黑豆每石坐扣豆價銀七錢六分除給車價銀三分五釐實扣銀七錢二分五釐按月造入馬銀檔內送部坐扣不得逾月扣結。○又議准八旗馬銀馬錢冊檔於上月十八日送部其馬豆冊檔於上月月底送部其回園回廠各項馬匹將回京時先造約略大數過檔收回後再將應添應減各數及何月日交差出青各日期聲明報部無故遲延承辦官叅處。○

又奏准滿洲蒙古漢軍並上三旗包衣。拴養官馬。駝隻。並八旗文武官員兵丁。拴養官馬。應領馬銀。將拴養人姓名。入冊咨部支領。每年九月。自廠回京。至次年三月出廠以前。官拴馬。月支料豆一石二斗。兵拴馬。月支料豆一石。四月至八月下廠時。留京餵養馬匹。每月止給乾銀。不給豆石。○嘉慶元年。議准。盧溝橋演放礮位之驍騎門千總兵丁等。每日各給飯銀一錢。○又議准。八旗兵丁私借銀兩。以每季所關米石充作利息者。該參佐領等查出。將借銀放銀及中

保人等一併送部治罪。所借銀兩不許償還。如不行查出。別經發覺。將該管參領等一併議處。○又議准。官兵弓箭撒袋腰刀。願扣俸餉製造者。其工價銀兩。官員於俸銀內作四季扣完。兵丁於錢糧內作二十箇月扣完。又兵丁遇升遷事故。其軍器若係本人自備者。酌量估價。於餉銀內作三箇月坐扣。給予原主。○二年議准。在京巡捕五營兵丁餉米。分夏冬二季。由步軍統領衙門造冊咨部。除中營就近在豐益倉支放外。其餘四營。由部覈明。即於本月輪放八旗甲

米之三倉內。數計米數多寡。左右二營。劄米數最多之倉。南營劄米數次多之倉。北營劄米數較少之倉支放。○七年奉

旨。兵丁餉銀。原屬有限。若再行坐扣。伊等何以為生。著將一切扣餉之例。永行停止。○八年覆准。健銳營八旗。添設官學教習八員。於繙譯生員監生內。考取送補。給予馬甲錢糧一分。俟坐補馬甲額缺之日起支。○十年奏准。從前銀庫每月支放兵丁餉錢。先期將應放錢文數目。行知寶泉局。照應放之數解庫。按佐領支放。惟銀庫地面窄狹。

若仍照佐領支放。未免紛紛擁擠。嗣後支放八旗滿洲蒙古漢軍餉錢。按照甲喇放給。內務府三旗。按旗放給。令銀庫各員會同局員。眼同戶部監放官。並江南道御史支放。以期周密。而便稽查。○又定。在旗食餉兵丁報捐職官者。該旗於接准收捐部文之日起。即行裁扣錢糧。如於報捐後。部文尚未知照。先行告退者。按告退日期。裁扣錢糧。其由鷹狗備箭等處拜唐阿報捐者。未經銓選以前。仍令在原差上行走。毋庸開缺。○又定。製造庫樓軍錢糧。向係搭放錢文。因

市集錢價過賤。概行按數易銀支發。○又定八旗捐監人等。由親軍護軍領催捐納監生者。准其支食本身錢糧。其由馬甲養育兵捐納監生者。即行出缺另補。○十三年奉

旨。戶部會同八旗滿洲都統倉場侍郎議。駁鐵保奏八旗官兵應領米石。於土成中酌折二成銀兩一摺。所議甚是。京師五方輻輳。商民雲集。本處產糧既少。又無別項販運糧石。專賴官員兵丁等所餘之米。流通糶糴。藉資餬口。是以自王公以及官兵等應領米糧定額。俱酌量從寬。並非計口授食。即如親王每歲領

米萬石。甚屬寬裕。豈為其一身計乎。原以該王公官兵等祿糈所入。既可贍其身家。並可酌糶餘糧。俾稍霑潤。立法至為詳備。若如該督所奏。於官兵應支米石。改給折色二成。不惟於八旗生計。恐致拮据。即以每歲少放米五十餘萬石計算。於商民口食之需。亦多未便。況現在市集糧價。已較前加增。儻再減放官糧。勢必益形昂貴。而天庾儲蓄。徒令陳陳相因。又安用漕糧源源轉運為耶。鐵保係屬旗員。曾經管理旗務。乃於官兵應領俸糧。並不通盤籌畫。輒請稍為變通。酌給二成折色。實屬妄改舊章。冒昧不合。著傳旨

申飭。仍交部議處。為輕改成憲。不知大體者戒。○十六年

諭健銳營官兵。著照從前圓明園八旗借帑生息之例。賞借廣儲司閒款銀五萬兩。交兩淮鹽商按月一分生息。所有該營官兵應支息銀。俟該商等利銀解到之日。停其扣利。分限五年繳還成本。以示體恤。○十八年奏准。內務府養育兵挑取校尉六百九名。除養育兵每月餉銀一兩。照舊支給外。每名每月添給銀一兩。共銀六百零九兩。以佐當差之用。○二十年覆准。官學生挑補鑾儀衛學習鳴

贊鞭官。給予馬甲錢糧。俟坐補額缺之日。入檔起支。○二十二年議准。

圓明園八旗教習六員。歸於禮部考取送補。如有錢糧者。仍食本身錢糧。無原餉之人。俟坐補教習之日。每月支給餉銀二兩。歲支米二十一石二斗。○又議准。外火器營左右兩翼。各設清文教習二員。由禮部考取送補。每月給馬甲錢糧一分。坐補之日起支。○又奏准。武備院隨園。所有官駝額內倒斃者。每隻給價銀二十兩。由兵部出給印領。令收駝官赴戶部領回。交存藩庫。

以備採買應用。○道光四年覆准。兵丁告假送眷赴任。因留辦家務開缺者。按各省憑限。准給一去程限。其限滿後長支餉銀庫銀。一併追繳。○又奏准。各項拜唐阿挑補學習贊讀等官。照前鋒鳥槍護軍挑補後換補護軍之例。於拜唐阿出缺後。即行坐補馬甲。○又奏准。挑取各部院衙門當差食餉官兵拜唐阿等。各旗營造送錢糧檔內。詳細註明在何衙門當差字樣。以便查覈。○五年奏准。在京八旗圈拴餘馬一千匹。交察哈爾分羣牧放。各羣設立牧長。每名月給

餉銀二兩。牧副每名月給餉銀一兩五錢。牧丁
每名月給餉銀一兩。在節存馬乾銀內動支。由
察哈爾官員便差赴部支領。○又奏准。八旗原
圈馬共計二千四百匹。改撥前鋒營二百匹。護
軍營八百匹。察哈爾常川牧放一千匹。其餘馬
四百匹。改撥巡捕營滿洲蒙古馬兵。演習騎射。
節省馬乾銀兩。分給京旗移居雙城堡津貼公
幫之用。○七年咨准。八旗各營兵丁人等。如有
緣事羈禁。及革退逃走病故等事。在餉冊過部
以前。冊內未及裁汰者。即將入檔餉銀扣存各

旗營庫內。不得令該兵丁家屬領出。仍將庫存
餉銀。入於下月造支餉冊內。聲明照數扣抵。○
又奏准。兵丁初借庫銀。上月二十日以前過檔。
左翼四旗。於本月初九日開放。右翼四旗。於初
十日開放。凡兵丁病故在過檔以後者。入檔庫
銀。照餉銀之例。一體關支。仍入於寬免案內辦
理。病故在未經過檔以前。未及裁汰。以及過檔
後。未經開放以前。遇有革退逃走事故。即將銀
兩存儲各旗營庫內。於下月造支庫銀冊內。聲
明照數扣抵。○又奏准。閒散宗室覺羅及八旗

官兵拜唐阿等。凡緣事送宗人府刑部。應行扣
餉者。各該旗即於餉冊內聲明停領。俟完案之
日。再行分別扣支。○又奏准。告假出外兵丁。總
以原給假限為準。如逾限未回。即於餉冊內聲
明停領。俟該兵丁回京之日。報部。由部覈計往
返程途。分別扣支。○又議准。各旗五品印務章
京。並各營委參領等官。既有養廉可支。其子孫
俱不准挑補養育兵缺。如有原食養育兵錢糧
者。於其祖父得缺之日。裁汰。其信礮章京步軍
校閒散雲騎尉。驍騎校護軍校筆帖式等微員。

之子孫。仍准挑補。○十四年咨准八旗內務府。每季造送支領甲米冊檔。將革退逃走挑補各兵。分析聲明添裁月日。及何人頂補何人之缺。並周年孀婦起支季分。暨應領人名米數。切實註明。以杜浮冒。儻有遺漏舛錯。查取職名議處。○十六年奏准京城巡捕五營兵丁餉米。每年分為夏冬二季。由步軍統領衙門造冊。咨部請領中營坐劄豐益倉開放。其南北左右四營。按照城內祿米南新舊太。海運北新富新興平。城外太平萬安。裁裕豐儲濟等十一倉之次序。每

季專劄一倉輪流開放。○二十三年

諭前據載銓等奏擬將庫支各款減平兌放。原為撙節經費起見。當經降旨准行。惟念兵餉一項。為該兵丁等計口授食之需。近復疊降諭旨。勤加訓練。若照該王大臣所議。雖減數無多。而兵力未免支絀。非所以示體恤。所有京內京外各旗營及直省額設各兵丁。應領錢糧。仍著一體照舊支放。毋庸酌減。以示朕優加矜恤之至意。○二十九年奏准。步軍統領衙門添設巡夜兵丁八百名。由八旗閒散人等挑補。並於每旗滿洲抽出步甲六分。蒙古漢軍各抽出

步甲二分。在巡夜兵每十名內拔補領催一名。給予雙分錢糧。漢軍兵丁。每翼添設各項頂戴四名。在該翼四旗內。各抽出步甲二缺。作為錢糧四分。給予公費。○咸豐三年

諭前據戶部奏變通俸餉放款。經惠親王等陳奏。分別准駁。復交戶部覈議。茲據戶部覆覈具奏。所有八旗兵丁。生計艱難。若照搭放餉錢之例。以一串折銀一兩。不足以示體恤。著即照此次部議。除原搭餉錢。照舊支放外。其餘應領餉銀。自十月為始。均按制錢兩串。折銀一兩發給。○又奏准。八旗官兵俸餉。關繫緊

要照各省兵餉例歸入冬撥案內一律酌撥。○
四年覆准兵丁領項每兩照餉銀折給制錢二
串。○八年

諭惠親王等奏八旗兵餉鐵制錢酌擬於三箇月內暫
加一成一摺。八旗兵餉本係搭放鐵制錢二成現在
物價昂貴該兵丁等生計維艱著加恩自三月起至
五月止每月加放鐵制錢一成以示體恤。至六月以
後仍搭放鐵制錢二成俟該局鼓鑄充裕再行酌擬
加成搭放。○又

諭前因京師物價昂貴八旗兵丁生計維艱降旨於兵

餉鐵制錢二成外加放一成。至五月以後暫停搭放。現在節屆冬令。物價未平。恐八旗兵丁未免尚形拮据。據惠親王等查明鐵錢局鼓鑄錢文。新陳相接。尚堪敷用。著加恩自十月起。至十二月止。每月仍加放鐵制錢一成。以示體恤。○九年

諭。本年入春以來。雨澤稀少。糧米騰貴。加以銀價日增。錢法壅滯。兵丁生計維艱。朕心實深軫念。著自五月為始。所有在京八旗及巡捕各營兵丁月餉。應放鈔票折銀三十五萬一千兩零。內加恩搭放實銀三成。應由何款項下發給。著戶部覈辦。其八旗應放粟米。

折色舊例每石折給京錢二千四百文並著加倍放給。用示朕體恤兵丁至意。○十年

諭京城各旗營兵餉。自上年歷次搭放實銀以來。該兵丁領項較前雖覺寬裕。惟念物價仍未平減。兵丁不免拮据。除二成錢四成實銀照舊放給外。著加恩自三月為始。將應折四成鈔票。改放三成實銀。以示體恤。○又

諭京師應放八旗及各營兵餉。前經戶部奏定新章。按月支放實銀五成。現在天氣嚴寒。兵丁生計維艱。所有本年十二月內應行豫放。明年正月分兵餉。著加

恩添放實銀二成。以示體恤。自二月以後。仍照新章辦理。○又奏准。八旗兵餉。分別減成。驍騎校等項官兵。按四成實銀。二成錢折開放。技勇養育兵等。按五成實銀。二成錢折開放。槍甲等。按六成實銀開放。○同治元年

諭戶部奏籌濟年內餉需。並撙節來年用款一摺。所有豫放明年正月兵餉。著該部仍照舊給發五成實銀。二成現錢。自明年二月起。方准照戶部所請。暫減一成。統以四成實銀。二成現錢放給。以示體恤。○二年

諭朕奉

兩宮

皇太后懿旨。軍興以來。需餉甚鉅。各省地丁錢糧關稅等項。因之多未能如額報解。戶部於各路軍營撥餉。竭力籌維。一切度支。均從節省。八旗兵丁錢糧。亦暫行減成開放。每一念及該兵丁等仰事俯畜。資用支絀。深宮宵旰。軫恤時殷。茲當清風戒寒。轉瞬即交冬令。該兵丁等亟應量加撫恤。所有八旗兵丁。著照現行放款事例。加恩賞給一月錢糧。即由戶部迅速籌給。現在庫存尚非充裕。或於各項費用。酌加撙節。將所餘之款。儘數撥歸此項錢糧開放。該部務當仰體

朝廷德意。迅飭各該旗。卽於十月內支領。俾禁旅速
霑實惠。○五年奏准。旗員未及歲廕監生。先行支食
養育兵錢糧。俟及歲當差時。再行照品食俸。以
示優恤。○六年奏准。八旗兵餉。均加一成。驍騎
校等項官兵。放給五成實銀。二成錢折。技勇養
育兵等。放給六成實銀。二成錢折。槍甲等。放給
七成實銀。○八年咨准。八旗兵丁。豫領次年正
月分錢糧馬銀馬錢。統限於本年十二月初十
日以前。一律造具細冊送部。不得仍照尋常月
分定限造送。致滋遲誤。○十年議准。嗣後兵丁

承襲恩騎尉世職者。除支食二兩錢糧及一兩五錢之養育兵。仍令支食世職俸祿。毋庸支領兵丁餉糈。外其餘三兩以上之各項兵丁。雖經承襲恩騎尉。仍令支食原餉。毋庸支給恩騎尉俸祿。仍兼充兵丁差使。照恩騎尉應補官階補用。○又奏准。鑲黃旗滿洲俄羅斯佐領下。添設養育兵十四名。每名月領餉銀米石。仿照八旗成案。一律辦理。○十二年咨准。各衙門應領款項。投遞文冊內。於人名銀錢數目。不准添改。空補旁跨字樣。印花上尤不准空補。儻有此等情

事。應將丈冊駁回更正。並將承辦章京等照例查叅。○又咨准八旗各營兵丁。遇有升遷出差。及遇事羈禁病故革退逃走等事。隨時咨報戶部。仍於月餉冊內聲明裁汰。如實係過檔後遇有前項事故餉冊未及裁汰者。刻即專文補報。以憑分別扣除。儻延不咨報。致該事故兵丁應裁餉銀。仍行隨冊領出。即將該承辦章京等照例查叅。○光緒七年定。滿蒙漢八旗各營食餉兵丁。如有借補別旗。即於借缺之日。隨時專咨報部存案。遇有事故。詳細聲明於何年月日借

補何旗食餉。及撥還本旗時。亦須聲明咨報。以備查考。○八年覆准。閒散覺羅報捐職官。未經分發以前。支食養贍錢糧。於分發之日起。即行報部裁汰。○九年奏准。三旗親軍營。拴備差馬一百五十四。每匹月支馬乾實銀三兩。以敷兵丁餵養之用。○十一年欽奉

慈禧端佑康頤昭豫皇太后懿旨。前因咸豐年間。辦理軍務。需餉甚鉅。將王公官員暨兵丁等俸餉。減成放給。樽節度支。以濟要需。原屬一時權宜之計。現在軍務救平。朝廷體恤臣僕。廩念時殷。加恩著將王公及

在京官員俸銀。京師旗綠各營兵丁餉銀。並太監錢糧。自光緒十二年正月。起一律照舊制全數放給。○十二年咨准。八旗各營每月造送錢糧冊檔冊尾。除照向章開列食幾兩兵丁若干名外。再於共數內。將兵丁名目。分別開列各若干名。以便考覈。○又奏准。八旗滿洲蒙古漢軍槍兵藤牌兵。仍照舊放給公費銀兩。以資教練。○又奏准。八旗漢軍加操礮位。添給津貼口分。官兵執事人等及礮腳心紅等項。每旗每月請領銀一百十八兩。八旗每月共領銀九百四十四兩。○又

奏准。兵丁找借庫銀。起支之日。參差不齊。找領之數。無從畫一。恐啟重支之弊。今釐定章程。不准找借。其初借庫銀。仍照舊借給。按月扣息。不扣本銀。每屆年終。奏銷冊內。將各旗支領庫銀。兵丁初借若干名。寬免若干名。追繳若干名。彙總覈算。一年所放庫銀之數。庶易稽考。○又奏准。八旗都統及各管營大臣。凡有關食餉者。如某旗有驍騎校若干名。領催若干名。兵丁若干名。以及親軍前鋒護軍各營。

圓明園健銳營。內外火器營。所有各校若干名。兵

丁若干名。均各分造細冊。將額定數目。逐款開載。咨送戶部。由戶部送往兵部。按款覈對。如數目相符。即作為戶部底冊。每月開放兵餉時。照冊覈對。儻若舛錯浮多。一面扣除。一面行查該旗。如有情弊。據實叅辦。○又奏准。向來各旗營新挑兵丁。均造入大檔。一併領餉。新舊名目不清。易滋牽混。嗣後凡本年新挑兵丁。俱不列入大檔。另造一冊。將新挑兵丁。係補何人之缺。並挑補月日。於花名下註明。俟次月即將此項兵丁。歸入大檔支領。○又奏准。各旗營造送各項

錢糧冊檔。按篇俱用騎縫印信。冊內黏補之處。均行蓋印。如有黏補未蓋印者。即駁回補蓋。並查明有無情弊。儻係私行挖補。根究懲辦。○十三年咨准。各旗新挑兵丁。支領初借庫銀。即造入支領餉銀另冊內。一併請領。

欽定大清會典事例卷二百五十五

戶部

俸餉

各省兵餉一

各省兵餉。○馬兵月給銀二兩。步兵一兩五錢。守兵一兩。皆月支米三斗。馬兵每名給馬一匹。春冬月支豆九斗。夏秋六斗。草均三十束。○八旗駐防武職丁糧馬乾。將軍家口四十名。馬五十匹。副都統家口三十五名。馬四十匹。協領家口三十名。馬三十匹。佐領家口二十名。馬二十匹。防禦家口十有四名。馬十有五匹。驍騎校有

品級筆帖式。家口十有二名。馬十匹。未入流筆帖式。領催。驍騎。家口七名。馬六匹。弓匠。鐵匠。家口五名。馬三匹。驍騎。礮手。月給餉銀二兩。弓匠。鐵匠。一兩。水師營兵。與陸路兵同。水手。船匠。二兩至一兩不等。○順治元年題准。凡部撥各省餉銀。由布政使司轉發駐防兵馬處支給。○又定。各處兵糧。戶部酌定題請。截留漕糧支給。如京城需米。仍令起運。就近採買供應。○又定。各鎮馬兵。月給餉銀一兩五錢。步兵一兩。○二年定。駐防關口及外省甲兵。月給餉銀一兩。○又

議准。兵丁自備馬匹。編入營伍騎操者。給予草料。各將弁自備。不係行伍差調者。不得概給。○三年覆准。每馬一匹。日支豆四升。草一束。○又定。八旗兵駐防遠地。每名月給米五斗。○四年題准。馬兵月給銀二兩。步兵一兩五錢。守兵一兩。馬乾草豆。照例按季關支。春冬有豆草處。每月給豆九斗。草三十束。每束重七斤。無豆草處。月給乾銀一兩。夏秋有放青處。月給乾銀五錢。無放青處。月給乾銀九錢。○又題准。各鎮兵無論馬步戰守。每名月給米五斗。與餉銀按季同支。

○五年定。各督撫於題請兵餉疏內。開列該撫額徵錢糧現在實數。及兵馬歲需餉乾數目。以便部撥。○又題准。各鎮兵有米處支米。無米處照時價折給。○又定。發餉均用倉斗。各鎮兵每名月給米三斗。八旗駐防兵每二口月給米五斗。○又覆准。各邊撥給屯糧。不產米地方。以小麥照數抵兌。○又覆准。浙江省駐防兵馬。仍支本色綠營兵馬。無論春夏月。均給乾銀一兩。○又議准。各旗兵馬。每匹日給草二束。○六年覆准。福建省營馬。每匹月給乾銀一兩。○八年議

准。駐防官兵。既按口支發糧餉草豆。其行月錢糧。永行停止。○十年議准。奉調出征兵月餉。皆令軍前全支。其家止給月糧三斗。○十一年覆准。各督標兵馬。三步七均為戰兵。馬兵月支餉銀一兩五錢。步兵一兩。均月支米三倉斗。無米折給銀四錢。○十二年題准。兵丁皆給月糧。若出征給予行糧。月糧止給一半。○又議准。各標兵馬。有放青地方。春冬月給乾銀九錢。夏秋五錢。無放青地方。春冬月給乾銀一兩二錢。夏秋九錢。○十三年奉

旨嗣後兵丁出征差遣。其家口月餉。仍准全給。○又復准。水師營內正舵捕盜。月給餉銀一兩八錢。水手兵一兩。○又題准。各省駐防都統。限定家口六十名。副都統四十名。參領三十五名。防禦三十名。兵二名。均給月糧。○十四年覆准。各省駐防及綠營官兵馬匹。產豆省分。照舊給豆。其餘以本省所產糧米撥給。○又題准。各省兵餉。由部會計。先撥十分之八。其二分俟開送兵馬實在數目到部。覈明補給。○十七年議准。駐防各官及督撫提鎮等家口。向來月給餉銀二兩。三

匹馬草料。今定月給餉銀一兩。一匹馬草料。○
又覆准。京口水師。增設捕舵什長。繚碇手。每名
月給銀一兩五錢。水手匠役一兩。均月給米三
斗。○康熙四年議准。雲貴兩省駐防驍騎家口
月米。每口二斗五升。○六年題准。各省駐防領
催家口。限定七名。驍騎限定五名。均支月糧。○
十三年議准。陝西省兵月糧。均為三分。二分撥
銀。一分撥米。○十九年議准。荊州等處駐防兵。
每兵支給十名口糧。三匹馬草料。○二十二年
議准。各處駐防將軍。限定家口四十名。馬五十

匹。副都統家口三十五名。馬四十匹。協領三十名。馬三十匹。佐領二十名。馬二十匹。防禦十有四名。馬十有五匹。驍騎校有品級筆帖式十有二名。馬十匹。未入流筆帖式領催驍騎七名。馬六匹。弓匠鐵匠五名。馬三匹。各准支給月糧草料。○二十三年題准。各省駐防官兵。應給米豆草料。如本色不敷。均按時價折銀。如徇情浮折。事發交部議處。○二十五年覆准。京口駐防兵糧。將鎮江府丹徒縣漕米截留支給。○二十六年覆准。貴州省每年分撥協餉時。將次年春季

之銀。一併撥出。永為定例。○又覆准。甘肅省甯夏一屬。額設米糧。除就近支發鎮營兵糧外。每年尚有餘贍。甘涼西肅等處。兵多糧少。每年動帑折給。各兵自行採買。應將甯夏糧內。撥運三十萬石。分存甘涼西肅莊浪等處備用。○二十七年

諭。陝西甘肅兵餉。若將山東河南錢糧撥解。必致煩擾驛遞。有累小民。著將戶部庫銀。照數發往充餉。其山東山西河南錢糧。不必撥解甘肅。止著撥解四川。○又議准。直隸各省駐防滿洲漢軍並綠營兵馬。

連閏歲需俸餉米糧草料等項。舊例撥給九分五釐。以小建截曠等銀湊足。自二十八年為始。直省兵餉。均全撥十分。其應扣建曠銀。別行扣出。報部充餉。○又題准。四川省廣元縣駐防官兵。每米一石。折銀一兩。草一束。折銀一分。於歲終奏銷。○又覆准。京口等處不敷兵餉。白米每石折銀八錢五分。粟米七錢五分。豆七錢。草每束七釐。○又題准。陝西省駐防兵丁。近年均係西安所屬之民。將米豆草供應。抵完正賦。未免跋涉。自二十八年為始。止將一半運省供應。其

餘一半。照改徵之例。給發各兵自行採買。○又題准。廣東省營馬。時多倒斃。口糧亦不敷。照荊州等處駐防兵例。每兵支給十名口糧。三匹馬草料。自二十九年。起。在存庫銀內照數支給。○三十年

諭。察哈爾護軍校。驍騎校。護軍領催。向未給餉。嗣後著月給銀各二兩。驍騎及執事人。月給銀各一兩。俟其贍足時停止。○又題准。山西省大同府產豆甚少。存豆無幾。嗣後駐防旗兵。以米抵給。○又覆准。陝西省駐防官兵。自本年為始。春冬每馬一匹。日

支豌豆四升。夏秋日支豌豆三升。○又覆准。大同駐防官兵。每豆一石。折銀一兩一錢。草每束折銀一分五釐。○又覆准。山東省德州駐防兵月米。例於二月支發一半。民間輸糧。在秋成之後。令於本年秋動帑採買。以備明春支發。次年應徵額米。均於秋成後。徵解德州儲倉。半為本年秋季支發之用。半為來年春季支發之用。○又題准。貴州省兵米。本折兼支。每年秋成時。豫令各該府按照時價覈實。以便均勻折給。○又題准。河南省兵月給米三斗。照舊例折給銀四

錢。○又題准。山東省濟陽等六處額徵麥。令收本色解倉充德州兵餉。○三十一年覆准。陝西省駐防官兵口糧。仍令支米。其家下奴僕口糧。將米麥豌豆搭放。○又覆准。駐防甯夏官兵馬匹。於四月起放青。其草料於文到日停止。○又覆准。山東省官兵米豆草價值。每歲於四月估報。但價值因時低昂。嗣後應分作二次題估。春夏二季。於五月初。秋冬二季。於十月初估計。○又覆准。陝西省潼關等營各旗官兵。均係分防要隘。均照綠營官兵之例支米。○又覆准。福建

省臺灣。地居海外。應解司庫錢糧。就近抵作本地兵餉。○又覆准。雲南省兵餉。存庫銀不能接濟。嗣後撥兵餉時。照貴州省例。豫發一季。○三十二年題准。雲南省儲米。最易朽腐。其產米之鄉。駐兵無幾。駐兵之地。出米無多。令計各倉儲備之數。通長酌定。應本應折。四年更例一次。○三十三年覆准。山西省大同府所徵雜糧。折徵米豆草。於十分內。徵米四分。豆四分。草二分。以給兵餉。○又覆准。大同府屬實徵地畝銀錢。改徵粟米豆草。粟米每石抵銀一兩一錢五分。豆

每石九錢七分。草每束一分五釐。不產穀草者。以山荒草二束。抵穀草一束交納。支給官兵。尚有不敷。照改徵之價折給。○又題准。江甯駐防官兵應支馬豆。向於春季支給本色。但豆係秋季始徵。今將本色改為冬季支給。於春季支折色。○又覆准。陝西甘肅涼州西甯地方兵米。每年正月。徵本汛屯糧供支。民苦豫徵。將河西五廳積麥。撥給三十三年兵米。其本年屯糧。於秋成後開徵。以作下年兵糧。又延綏鎮汛。沙磧苦寒。暫徵折色一年。本地之糧。亦留作下年支用。

又固原甘肅涼州等處。部撥臨洮等屬之糧。道遠難運。豫行臨洮等屬地方官。將糧就近變價。解交藩庫。於三十四年起。折給不敷兵糧。○又題准。直隸省古北口。每年五六月多雨。山水陡發。販買不通。將此三月兵糧。支給本色。○三十四年題准。貴州省兵餉。豫撥鄰省銀二十萬兩。豫年冬月解黔。湊發春夏二季之餉。俟他省四月以後餉銀解黔。湊發秋冬二季之餉。○又覆准。京口兵米。原係截留鎮屬漕米支給。今三十四年漕米。已經蠲免。止有應徵一分。不敷支

給。將三十年豫備米動用。於下運漕糧內截留補足。○三十六年

諭。年來察哈爾八旗官兵。效力甚勤。伊等本年俸餉。原議俟勒減噶爾丹後。頒恩詔時給予。未免稍遲。察哈爾官員俸祿。著視京官酌減給發。護軍仍月給銀二兩。驍騎一兩。○三十七年覆准。山東省鎮標營兵。每月支給馬乾。獨撫標俟估題部覆後。方行支給。嗣後照鎮標一例按月折給。○三十九年題准。湖北省黃州府屬之黃梅麻城黃安武昌府屬之通山。大冶五縣。共米二萬七千二百二十石。

解至荊鄖等汛。支發兵糧。○四十一年覆准。陝西省洮岷。蘭州舊洮。三營堡糧草。於附近之禮縣西固所。額徵糧內動支。不敷者。於司庫存儲各項銀內支給。○又覆准。山東省本年兵米。將厯城等州縣存倉穀內。勻撥給發。每米一石。折給穀二石。○又覆准。四川省化林鎮地不產米。照松潘鎮例。每斗折給銀一錢六分四釐。○四十二年題准。湖北省各營兵米。於南糧支給。○四十三年覆准。陝西省涼州等鎮標營所支馬草。每束原折銀五釐。今增給五釐。莊浪等營原

折銀七釐五毫。今增給二釐五毫。○四十四年
覆准。貴州省貴陽府存儲秋糧。各州縣建倉分
儲搭放兵餉。○四十六年

諭雲南金銀銅錫等礦廠。自四十四年冬季起。至四十
五年秋季止。所收稅銀八萬一百五十二兩。撥給兵
餉。○又題准。山西省本年支給兵米。每石折銀九錢
二分。○四十七年議准。直隸省駐防兵。向支給
半米半銀。嗣後照舊全支本色。○又議准。直省
駐防官兵歲餉。隨時撥給。恐致遲誤。嗣後凡來
年應需兵餉。各該督撫於今歲估計確數咨部。

由部豫將來年所徵田賦雜項錢糧。並本年扣存建贖等銀。歲終彙撥具題。行令各省按款動支。○又議准。江南省駐防官兵。每年兵糧。在截留湖廣漕米六萬四千石內動支。○又議准。湖南省秋收米糧。豫撥次年春夏兵米。其秋冬二季。即於七月新徵糧內支給。嗣後每年照例徵收充餉。○四十九年議准。貴州省額徵銀。止八萬餘兩。兵餉需二十八萬有奇。例撥鄰省銀二十萬兩。嗣後務於二三月間解運。○又覆准。山東省高唐等十有一營兵馬豆草。夏秋二

季改折乾銀。○五十一年覆准。山東省鎮標兵
米折銀。嗣後酌定每石折銀九錢。隨餉支給。○
五十二年覆准。山東省水師營兵一千二百名。
每名月給銀一兩。難以度日。今遴選五百名。每
月給銀一兩五錢。○又題准。河標四營兵。同在
山東通省兵內領支月米。嗣後亦照例每石折
銀九錢。隨餉支領。○五十三年議准。雲南省各
府州縣米。遵照全書。改徵折色一年。以作兵餉。
次年再徵本色。嗣後每屆四年。折徵一次。○五
十四年議准。廣東省高州府電白縣。改徵折色

米四千一百二石有奇。撥雷州府兵米。令將雷州府兵米折價支給。以免解運。○又議准。福建省每年兵餉不敷。將鄰省錢糧協撥。○五十五年覆准。貴州省兵米。秋冬折銀。每至次年春夏始行給發。令於藩庫內掾借銀給發。該州縣於奏銷前解庫還項。○五十九年覆准。江西省贛關額稅銀。並銅斤腳價。就近留充前標兵餉。○又覆准。陝西省旗標官兵。應需俸餉。令該撫將西鳳二倉現存捐米動支。○雍正元年

諭。各省駐防官兵。折給米豆草等項。價值不等。著交與

吏戶兵三部。將各省駐防及綠旗官兵折給價值。除照每年題定數目折給省外。其每年多寡不等。未定折給數目之省。應照各省屢年折給之中價議定價值已定。易於遵行。如豐收之年。價值既賤。少有餘贖。於官兵亦有裨益。如歉收之年。價值必昂。該督撫聲明具奏之時。恩自朕施。欽此。遵

旨議定。山東。河南。江蘇。安徽。江西。浙江。湖北。湖南。廣東。廣西。雲南。貴州等十二省駐防兵及綠營兵折給銀。米每石自五錢至一兩。豆每石自五錢至九錢七分。草每束自三釐至九釐二毫。不等。均

照從前題定各地方價值折給官兵自行採買。其直隸山西福建陝西甘肅四川等省均按照屢年各省分價銀。米每石自三錢四分至一兩一錢二分。豆每石自二錢八分至一兩。草每束自五釐至三分不等。惟甘肅省提標各營折給官員杭米。每石價銀一兩五錢。四川省龍安松潘茂州監理廳等四處米每石價銀自一兩二錢四分至一兩六錢四分不等。各省駐防兵不敷米均照時價採買支給。其河南江南浙江三省米豆草並無一定價值。今將河南杭米每石

折中定為一兩五錢。粟米每石一兩二錢。豆每石一兩一錢。草每束一分七釐。江南浙江兩省採買兵米。每石均定為一兩二錢。又四川省成都府駐防官兵。折給米豆草價值。白米每石九錢。中米每石八錢五分。豆每石一兩。草每束一分。均為定例。照數支給。○又覆准。雲南省昆明等十六府州縣。並劍川州駐紮各兵。除本處每歲徵米。足可供支。仍聽各兵支米外。其兵多米少之處。每年酌給本色三季。折色一季。○二年覆准。各省兵糧。於本省州縣衛所撥運。以供支

給令該督撫確查營汛兵數。除額徵足給兵糧。州縣外。其不敷兵米之處。務先儘鄰近地方米糧。秉公撥給。以二年秋季題報。永為定例。至營汛尚有遷移之兵。或遇調遣。其增減盈縮。在兵馬錢糧冊內。聲明報部。○又題准。福建省兵多米少之福州。駐防各營。及泉州。漳州。福甯等府。州各標協營。除撥就近所屬額米支發外。不敷兵餉。向係折色。至興化。延平。建甯。邵武。汀州。五府屬各標協營。米多兵少。除給兵餉外。餘米協運省倉。勻給駐防及綠營各營兵餉。至臺灣各

營兵餉。例於臺灣鳳山諸羅今改嘉義三縣額徵稻

粟內。就近碾支。節年所徵糧米。先儘本地。次及

鄰近。業經題明。永為定例。至各營建曠。及各屬

升科米。與徵救折米。歲有加增。仍給兵食。免給

折色。○又題准。福建省臺灣澎湖官弁。赴省領

餉。重洋涉險。不免稽遲。將臺灣鳳山諸羅彰化

四縣倉粟。留儲三十六萬石。備五年兵食。每年

額徵粟十有三萬九千四百餘石。止分徵七萬

二千石。供一年兵食。餘改為折價。即留充臺澎

兵餉。○又議准。廣東省電白縣。向折徵米四千

一百餘石。原為雷州府兵糧不敷而設。近年該處兵少米多。令折銀二千五十一兩。解送雷州府。仍令遵奉定價。每石五錢。折給兵丁。造入奏銷冊內具題。○又覆准。江南省京口兵糧。向係本省各府撥解。康熙二十五年。改撥鎮屬漕米。自雍正三年為始。照元年題定兵米折中價值。每石折銀一兩二錢。動支藩庫銀。該將軍會同常鎮道按季給發。○三年議准。雲南省祿豐等十二府州縣額徵秋米。每石八錢折徵。解司充餉。安甯等三十二府州縣。照舊每屆四年。折徵

一次。至現存倉米七十萬餘石。挨年支發兵米。出陳易新。仍於歲終將實數造冊具題。○又覆准。山西省各屬應徵草折銀。自雍正四年為始。同地丁一併徵解司庫。於次年四月以前支給。嗣後照例於歲終估請。次年四月以前給發。○又題准。陝西省漢中府甯羌等五州縣歲徵屯糧。每糧一石折銀一兩。在本管州縣完納解司。兵馬所需糧料。每石以一兩折給。在司庫支領。○又覆准。四川省駐防兵米。仍給折色。令各屬徵收折色銀。解交藩庫支給。○又覆准。福州省

駐防官兵。月支米穀草折價。白米每石價銀一兩。粟米九錢。穀四錢五分。草每束九釐。按月照數關支。毋庸豫估。亦毋庸扣留。歲終將支給數目。彙行報銷。仍造入該年兵馬奏銷冊內具題。至直隸等各省。遵照雍正元年定例。再無增減價值。均免其豫為題估。統於歲終報部查覈。○又覆准。湖南省兵米。除撥本色外。其遠隔產米州縣之各營。應支兵米。照舊每石六錢折給。永為定例。○四年覆准。廣西省每歲額徵兵餉。除支發外。尚有餘米八千餘石。自四年為始。均徵

折色。儘數收不敷支發。將存倉穀補給。俟豐年
於折徵銀內。買穀還倉。○又覆准。甘肅省安西
新收之兵。現止有一千九百五十五名。新調甘
涼肅更換戍兵。共三千四十五名。照出征例給
予口糧。其糧料每石以二兩二錢。草每束以三
分折給。俟屯田成熟後。該督撫再訪時價覈減。
並撥出山西省地丁銀十有五萬兩。存鞏昌司
庫備用。○又覆准。張家口撥往阿爾泰種地官
兵。在軍前每兵月支口糧一斗三升八合。其俸
餉銀。一半在軍前支領。一半扣留在營養贍家。

口。○五年覆准。四川省石泉。小河。二營內抽調移紮南坪官兵。所需兵米。自到南坪之日起。每米一斗。折給銀二錢四釐。在雍正四年兵餉截曠銀內動支。俟價平日。確訪時價。覈減具題。其原留石泉營之兵米。仍照原估之價。每斗以一錢二分四釐。覈算折給。至石泉營守備。每年徵收番民認納銀米。今既歸併南坪。番民所納銀米。令龍安營撥駐石泉營之把總徵收。逕入該年奏銷冊內。報部查覈。○又議准。廣西省桂林府屬應徵之米。改徵折色。每石定價八錢。將太

平。思恩二府。及鬱林營上思營上思州。三里營。協波汎等處兵糧。悉按數折給。○又覆准。四川雲南貴州。係邊遠省分。除撥給本年兵餉外。又撥銀各二十萬兩。以備下年兵餉。甘肅亦係邊遠。照三省之例。每年豫撥銀三十萬兩。以備下年兵餉。○又題准。陝西省駐防兵家口。每年應支折色本色米。共十有七萬一千五百餘石。自三月起。至年終止。將現存米糧。與折色按月支發。定為米七銀三。○六年題准。浙江省甯台。嚴溫處五府屬提標鎮協各營兵糧。向以各屬應

徵本年額米支發。今因本年之米。難以如期抵給。自七年為始。於各屬存倉穀內。撥出五萬三千一百五十二石。碾米二萬六千五百七十六石。於春夏二季。酌量借給一季。仍飭各屬將本年應徵米。按額徵完。遞相支發。○又題准。湖南省綏甯縣黃桑坪地方。所設營兵。歲需兵糧一千九百五十一石二斗。將該縣原徵解道折色。改徵本色。就近支給。遇閏加增。米每石以銀六錢扣算。○又題准。甘肅省各標營馬。應支折色豆草。除冬季於八九月間支給外。其次年春季。

亦於八九月間先期借給。次年估撥銀到日扣還。○又題准。江西省鎮標兵三百名。移紮銅鼓。歲需兵糧一千有八十石。於萬載新昌安義等縣解省倉米內就近撥給。○又題准。直隸省三河縣。歲需駐防兵糧二千五百石。於通倉支領。滄州歲需駐防兵糧七千石。截留江西漕米。以三千五百石。支發本年秋季二季。以三千五百石。留支次年春夏二季。○又題准。江西省南昌鎮標新增兵三百名。歲需兵糧一千有八十石。於進賢縣所徵折色內。改徵本色支給。○又題

准。湖北省荊州駐防兵米。向於春冬二季支給本色。夏秋二季本折兼支。青黃不接之時。各兵艱於採買。嗣後大營兵米。以六七兩月折色。改於冬季十月十一月支給。冬季十月十一月本色。改於六七兩月支給。遇閏酌量改支。○又題准。雲南省尋霑營官兵俸餉。停其搭錢。全以銀給發。○八年

諭。浙江乍浦新設水師兵。所領錢糧。已每月加賞五錢。其內有綠旗兵。既令於滿營教習操練。捕盜舵工等。尤屬效力勤勞。每月應一例加賞餉銀五錢。○又

諭天津水師營兵錢糧。前經部議。每月定為一兩五錢。朕近聞兵丁用度。稍有不敷。已降旨加為每月二兩。浙江乍浦水師營兵。亦應一體加恩。其新拔之兵。每月支銀一兩五錢者。著照天津之例。加為二兩。於雍正八年正月為始。○又

諭舊例武弁給予親丁名糧。以為養贍家口僕從之需。前朕聞弁員等離任之時。即將親丁名糧。召募補足。接任之人。陸續候補。每至經年數載之久。不得養贍之資。近聞武弁等若有升遷事故者。於離任之日。即將親丁名糧。按數開除。其住支銀米。歸作截贍項下。

彙報充餉。俟新任之人到任日。方許申報起支。嗣後武弁去任之時。其親丁名糧。照舊存留。不必歸入截曠項下。其署事之人。若係候補試用者。准其全行支給。以作養廉。若係現任之官兼理者。准其支給一半。將一半留營。以為修葺衙署。修補什物等項之費。即交該營存貯。如有動用之處。造冊申報該管上司查覈。○又

諭從前朕以武弁一年所得俸薪。不敷所用。令自提鎮以至千把總。皆量給予親丁名糧。以資養贍。今各省增設外委千把總。所辦者千把總之事。而所食者仍

止本身馬糧。一應公差紙筆衣馬之費。實有不敷。著將各省增設外委千把總。每人與步糧一分。即令其子弟家人頂食。以為養廉之資。儻有仍借辦公名色。扣剋兵餉。滋擾地方者。著該管官即行揭報指叅。○又議准。直省出師員缺。遞行委署者。除蔬菜燭炭心紅紙張。原係衙門辦公之用。應令署任支領外。其親丁名糧。草豆銀兩。署任之員。既領本任應得之項。出師官員各任內應得親丁名糧。照數全給出師官員家屬。其署任官若係特旨簡發者。並無應領本任親丁名糧。副將酌給三

十分。參將十二分。遊擊十分。守備六分。俱馬兵步兵各半。兵丁委署把總者酌添步兵錢糧二分。其署理官員有願就近支領者。即就近支領。○又覆准。各省題補引

見武官。來往道途。不無車馬之費。仍給本任親丁名糧一半。其餘一半。扣存造報。若委署係候補試用之員。即將扣存銀兩。照例給予。若係現任兼辦。並出師引

見之缺。遞行委署者。既各有本任。應給予本任應得之項。不准重複給予。但升遷事故員缺。並無應

領額設親丁名糧之員。其給予署任之例。亦應酌量通融。如係候補試用官員。應全行給予。如係現任遞行委署之員。亦照所署任全行給予。其最後接署之員。如係現任兼辦者。本任內全行給予。署任內給予一半。其餘一半。仍行存儲造報。以備公用。候補試用官員。仍照例全給。○又題准。直隸省古北口。倉存稜米粟米。向撥充古石二提協新兵一季食糧之用。嗣後每年夏秋二季。支發倉米。冬春二季。折銀支給。○又題准。甘肅省大通鎮屬測爾免之永安營。應給兵

丁糧料。每石折銀二兩。草每束折銀三分。將三六九十二等四月糧。冬季一季應支馬草料。均照此價折給。按年入於兵餉內估報覈銷。俟測爾免試墾成熟。再支本色。○又題准。直隸省宣化府撥運兵米不敷。向照撥運之數。改徵折色。解交受撥州縣支給兵餉。每年不敷米一萬四千七百七十四石五斗有奇。遇閏之年。不敷米一萬五千七百六石五斗有奇。照依折中價值。每米一石。折銀一兩。於司庫先行動給。令受撥州縣。照有閏數目。徵解司庫抵還。受撥州縣所

領米價。無閏之年。所徵閏銀。留存司庫。別行撥用。又阿爾泰駐防官兵。向在張家口倉支米。分各州縣撥運補還。因宣屬所徵屯米無幾。於司庫撥銀六千兩。採買米六千石。存儲備用。糶賣屯豆。補還原項。○又具奏。提督親丁名糧八十分。總兵六十分。副將三十分。參將二十分。均馬步各半。遊擊十有五分。馬七步八。都司十分。守備八分。均馬步各半。千總五分。馬一步四。把總四分。馬一步三。奉

旨。向來武弁等借親丁食糧之名。任意虛冒。多寡不等。

康熙四十二年。經九卿議准。湖廣提督條奏。提督以下。千把以上。各定親丁名糧數目。以為養育家口僕從之需。此時因湖廣馬兵數少。步兵數多。是以議定楚省官弁親丁。均於步兵額內頂補。至於他省。則當時未曾議定。大約各該處授受相沿。遂成規額。上年兵部議覆南陽鎮所請買補缺額親丁馬匹案內。令該鎮將親丁名糧。均於步兵額內頂補。並通行各省遵照等語。此部議過刻之處。武弁等養贍家口僕從。除名糧之外。別無所資。若但給以步糧。恐不敷用。有內顧之慮。著照所請。自提督至守備馬步各半。千總

馬一步四。把總馬一步三。各省一例遵行。俾武弁等養贍有資。以勵操守。儻於額定之外。再行虛冒兵餉一名。或違例多食馬糧者。一經發覺。定行從重治罪。

○九年覆准。浙江省甯邑海塘兵。應支兵糧。就近於海甯縣額徵南米內關支。○又議准。河南省南陽鎮新設信陽營。增馬兵二十名。每名歲支餉銀二十四兩。守兵三十五名。每名歲支餉銀十有二兩。春冬二季。支乾銀一兩。夏秋九錢。馬步兵每名歲支米三石六斗。各兵月米於汝甯營應徵本色內。均勻分食。不敷之米。每三斗

折銀四錢。其餉乾米折等銀。隨奉撥本年俸餉等銀內。一同支發。年終確數報銷。○又議准。甘肅四川雲貴邊遠省分。皆有豫撥次年春季兵餉之例。直隸等省。每年撥餉部文到日。已在開印之後。各營汎餉銀。勢必遲至二三月始行給發。應將直省兵餉。照四省之例。於歲需之外。再豫撥來春一季錢糧。統於冬撥案內。計省分兵餉之多寡。指定款項。留為次年春季兵餉。以免各兵懸餉之累。○又題准。貴州省新設古州鎮營。歲需兵餉。於廣西柳州慶遠二府存公米內。

照存七糶三。及桂林平樂二府折徵每石八錢之例。解運貴州。秋後採買還倉。儻穀價較長。俟下年購補。○又議准。山東省青州新設駐防官兵。其官兵俸餉口糧馬匹草料。悉照各省駐防之例。○十年議准。青州駐防官兵。粟米全行折給。每米一斗。折銀一錢。均於該年地糧銀內動支。○又議准。江南鎮海將軍。駐紮京口。並無豫備銀。設有調遣。無項料理。將八旗倉米折價銀兩。酌撥二萬兩。存儲鎮江府。以備急需。各省將軍提鎮駐紮地方。如有急需之處。亦於附近府

州縣庫內酌留銀支領。○又題准。山東省登標之青州壽光兗標中右沂州等營。並德州營。均改折色。奏銷仍照本色造報。嗣後均以折色報部。至米折價銀。登兗二標營。每米一石。以銀一兩折價。其德州營係照四季時價折色。例不畫一。嗣後德州營亦照青州等營米價折給。○又題准。直隸省宣化鎮標中左右三營。並獨石口張家口龍門等路。共增步兵四百名。應需餉銀米折馬乾等項。彙入直屬官兵俸餉豫估案內造報。其各兵應需夏季米。每石於定價一兩之

外。增銀一錢。於存公銀內給發。○十一年題准。直隸省河屯營。增設馬步兵五百名。歲需餉銀米折馬乾等項。於節年各案銀內。照數動支。彙入豫估冊內咨撥。以昭畫一。○又題准。山東省青州副都統。照江甯之例。給親丁名糧二十分。每分月支餉銀二兩。再步兵四百名。每名月給米二斗五升。按月支給。小建毋庸扣除。○又題准。河南省河北鎮所屬嵩縣。主祿二營馬兵。給月餉二兩。○又題准。廣東省瓊州府。距省遼遠。各營歲需兵餉銀八萬三千二百兩有奇。應於

瓊山等十三州縣內撥田賦銀七萬二千二百餘兩。就近解海南道庫給領。不敷銀。於海關稅銀動支。